

Neće biti izgradnje hidroelektrana na rijeci Ljutoj u općini Konjic.

Kantonalni sud u Sarajevu poništio je ekološku dozvolu Federalnog ministarstva za turizam i okoliš, dodijeljenu slovenskom investitoru "Turbo-institut".

Pravna borba ekoloških aktivista u ovom predmetu trajala je više od tri godine. Sada je na potezu država, koja ovakve presude treba i da provede, te u konačnici zaštiti svoje blago.

Presudom u BiH je osporena izgradnja hidroelektrana, i to na rijeci Ljutoj u Konjicu. Ono što su godinama ekološki aktivisti ukazivali, Kantonalni sud u Sarajevu je potvrdio. "Brane više od 30 metara ne mogu biti male, odnosno minihidroelektrane - kako je projektom predstavljen. Potapanje kanjona znači definitivno uništavanje kanjona", kaže ekološki aktivist Kenan Muftić.

Izdavanje dozvole pratile su brojne nelogičnosti. Slovenski investitor nakon dobijanja koncesionog prava za gradnju mijenja projekt.

Umjesto minihidroelektrana planira izgradnju tri hidroelektrane.

Upkos promjeni dobija ekološku dozvolu Federalnog ministarstva za turizam i okoliš.

To je urađeno pet mjeseci mimo zakonskog roka, bez kvalitetne studije o utjecaju na okolinu, javne rasprave i dozvole lokalnog stanovništva, stoji u presudi.

Sada je presuda korektiv koji jasno precizira, pojašnjava advokat ekoloških aktivista Nermin Vila, "da se napravi izuzetno kvalitetna javna rasprava da svim zainteresovanim udruženjima i pojedincima, da se da dovoljno vremena da se izjasne i da se njihov stav čuje".

Iako je presuda prošla neopaženo, dobar je povod za opomenu svim drugim investitorima koji planiraju slične projekte u našoj zemlji. Opomena je i za državu, jer otvara i pitanje nepostojanja strategije za energetsku efikasnost na državnom nivou. Entiteske strategije postoje, ali Evropa od nas traži razgovor s jednom adresom. Da je imamo, lokalno stanovništvo više bi se pitalo o energetskim projektima u njihovoј zajednici, smatraju stručnjaci.

"Lokalno stanovništvo nije samo uključeno u to da kaže DA ili NE za neki projekat, već su oni stvarni inicijatori tih projekata, oni su kasnije vlasnici manjim ili većim dijelom, tako da je njihova uloga proaktivna, a ne kao što je kod nas.

Nemamo neke aktivne uloge od početka", ističe Azrudin Husika, profesor na Mašinskom fakultetu u Sarajevu.

Za to vrijeme gubimo milionske iznose evropske pomoći, ali mnogi smatraju kako je veći problem što nemamo konkretnu ideju šta je strateško opredjeljenje ove države u pogledu izgradnje novih energetskih kapaciteta.

Presuda je pokazala da postoji sistem, postoje mehanizmi da se štetni projekti po prirodu i okoliš zaustave.

FBiH: Neće biti izgradnje HE na Ljutoj bez saglasnosti lokalne zajednice

izvor: aarhus.ba